

**Uunga siunnersuut: Sermip ergullu avammut nioqutissatut atorneqarnissaat pillugu
Inatsisartut inatsisaata allanngortinneqarneranik Inatsisartut inatsisaat nr.xx, yy 2016-
imeersoq**

*(Avammut nioqutissatut pisortani pilersuisumit sermimik imermillu pisisinnaanermut
inatsisimmi tunngaviusup allanngortinneqarnera)*

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

pillugu

Inuussutissarsiornermut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Inuussutissarsiornermut Ataatsimiititaliap sularinninnermini ilaasortarai:
Inatsisartunut ilaasortaq Siverth K. Heilmann, Atassut, siulittaasoq
Inatsisartunut ilaasortaq Sara Olsvig Inuit Ataqatigiit, siulittaasup tullia
Inatsisartunut ilaasortaq Justus Hansen, Demokraatit
Inatsisartunut ilaasortaq Suka K. Frederiksen, Siumut
Inatsisartunut ilaasortaq Múte B. Egede, Inuit Ataqatigiit

1. Siunnersuutip imarisaa siunertaalu

Namminersortut ingerlatsisut Kalaallit Nunaata erganik nunarsuarmi niuerfínnut avammut niueruteqarnissamik kissaateqartut pisortat pilersuinermit suliffeqarfiinut imeqarfinni pioreersuni imermik tunisassiornermit aalajangersimasumit sinneruttumik pisinissaq pillugu isumaqatigiissuteqarsinnaanissaannut periarfissaqarnerisa erseqqissarneqarnissaa inatsisip matuma allanngortinneqarnerani siunertaavoq.

Nunaqarfiit innaallagissamik imermillu pilersorneqarnerisa Namminersorerullutik Oqartussanit tiguneqarnerat pillugu Inatsisartut inatsisaat nr. 13, 6. november 1997-imeersoq naapertorlugu pisortat pilersuinermit suliffeqarfiat innuttaasunut pilersuinissamik pisussaaffeqarmat, pisussaaffik tamanna sukkulluunniit tamatigullu salliutinneqartassaaq aammalu sermip ergullu avammut niuerutigineqartarnerannut inatsit naapertorlugu akuersissummik tunniussinnermi pisussaaffiup tamatuma illuatungeriit isumaqatigiissutaanni maleruagassiivigineqarsimanissaa piunasaqaataassaaq.

2. Siunnersuutip Inatsisartuni siullermeerneqarnera

Siunnersuut tapersorsorluarneqarmat ataatsimiititaliamit aallarniutigalugu oqaatigineqassaaq. Tamanna ataatsimiititaliamit tusaatissatut tiguneqarpoq aammalu tamanna kiisalu inatsisissatut siunnersuutip annertunnginnera pissutigalugit isumaliutissiisummik naatsumik saqqummiussissalluni.

3. Tusarniaanermut akissutit

Siunnersuut 2016-imi 9. maajimit 13. juunimut tusarniaanermut nittartakkamiitinneqarpoq.

Siunnersuut aamma oqartussanut, kattuffinnut suliffeqarfinnullu makkununga nassiunneqarpoq:

KANUKOKA, Sulisitsisut, Nusuka, Ineqarnermut, Sanaartornermut Attaveqaaqatiginnermullu Naalakkersuisoqarfik, Aalisarnermut, Piniarnermut & Nunalerinermut Naalakkersuisoqarfik, Pinngortitamut, Avatangiisinut Nukissiuuteqarnermullu Naalakkersuisoqarfik, Nukissiorfiit, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, Pinngortitaleriffik og Ilisimatusarfik.

Makkunanga tusarniaanermut akissuteqaatit tiguneqarput:

KANUKOKA, Sulisitsisut, Aalisarnermut, Piniarnermut Nunalerinermullu Naalakkersuisoqarfik, Pinngortitamut, Avatangiisinut Nukissiuuteqarnermullu Naalakkersuisoqarfik, Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq.

3.1 Ataatsimiititaliap tusarniaanermut oqaaseqaataa

Ataatsimiititaliap piffissap tusarniaaffiusup sivilissusia pillugu oqaaseqatissaqanngilaq. Ilusiliineq eqqarsaatigalugu nalinginnaasumik nassuiaatit aammalu Naalakkersuisut tusarniaanermut akissutinik saqqummiussillutillu taakkununga akissutaat kinaassusiorsiunngitsumik sukumiisumillu suliarineqarsimasutut isikkoqarput. Tusarniaanermut akissutit ilanngussat aammalu pilersuinerup isumannaatsuunissaanik apeqqut Naalakkersuisunit pissusissaatut sukumiissuseqartumik sammineqartut ataatsimiititaliap naammagisimaarlugu maluginiarpaa, taamaalilluni innuttaasut imermik imigassamik pilersorneqarneranni isumannaassuseq inatsisissatut siunnersuutikkut ajorseriaateqartinneqassanngitsoq uppersarneqarluni.

4. Ataatsimiititaliap siunnersuummik suliarinninnera

Siunnersuummik matuminnga siullermeerineq siunnersuummik ataatsimut isigalugu tapersiiffiusoq Inuussutissarsiornermut Ataatsimiititaliamit aallarniutigalugu innersuussutigineqassaaq. Nunatsinni inuussutissarsiutinik ineriartortitsineq ingerlatiinnarlugulu siuarsassagutsigu aningaasaliisartut namminersortut pilersuineramik suliffeqarfinnik suleqateqarlutik niuerneramik tunngaveqarluni imermut tunngasunik suliniutinik aallartitsinissami suleqatiginissaat periarfissinnissaallu pisariaqartoq Inuussutissarsiornermut Ataatsimiititaliaq nalilivoq. Aammattaaq innuttaasunut innaallagiamik imermillu pilersuisussaataaneq tunisassiortunut namminersortunut sanilliullugu salliutinneqartuassasoq inatsisini atuuttuni qulakkeerneqarmat ataatsimiititaliamit toqqissisimanartinneqarpoq.

Inatsimmik allanguineq imermik imigassamik nunatsinneersumik avammut nioqquteqarnissaq siunertaralugu imermut tunngasumik suliniutinik aallartitsinissamut siursaataajumaartoq Naalakkersuisut assigalugit Inuussutissarsiornermut Ataatsimiititaliamit neriutiginneqarpoq.


5. Siunnersuutip aningaasaqarnikkut kingunerisassai

Siunnersuutip aningaasaqarnikkut kingunerisassai siunnersuummut nalinginnaasumik nassuiaatini Naalakkersuisunit nassuiaatigineqarput. Siunnersuutip aningaasaqarnikkut kingunerisassai pillugit inatsisissatut siunnersuummut nalinginnaasumik nassuiaatini nassuiatigineqartunit allaanerusumik isummernissamut tunngavissat pigineqartut tunngavigalugit ataatsimiititaliaq tunngavissaqarsorinngilaq.

6. Ataatsimiititaliap inassuteqaatai

Siunnersuut akuerineqassasoq ataatsimiititaliamit isumaqatigiittumit inassutigineqarpoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Siverth K Heilmann
Siulittaasoq



Sara Olsvig
Siulittaasup tullia



Justus Hansen



Suka K Frederiksen



Múte B. Egede